

是程堂集

序

曩子遊越州見其山平遠而逶迤其水澄泓而潏潏輕  
舟孤往二三十里忻然忘返然獨怪所謂南鎮者於諸  
山雁行耳而其名首載於職方與具區三江五湖等豈  
大禹之明德因神聖而重歟抑或以其磅礴敦龐回環  
曼延雖大小齊諸山而氣勢獨傑然有以自異與若然  
則神聖之遺區山川奇偉之所鍾亦宜有人焉羣萃州  
處而特立獨行者惜未之遇也去年春始得交於屠君  
孟昭孟昭故越人而居於杭觀其狀貌言論已於人人  
中異之旣而交且深盡讀其所爲詩而後確然知其爲  
特立獨行之士無疑也孟昭之詩氣伉以爽音大而宏

風此其所以異於人人者也不知其無所爲而爲是與抑有得於中有感於外有不能已於言者而後出於是與夫山非求異於部婁也山之長諸山者非求異於諸山也而固不能無異之至於不能無異之必推求其所以傑然者而後見其爲磅礴敦龐迴環曼延者焉人豈有異於是乎詩文又豈有異於是乎孟昭年少氣盛舉凡人世馳騫爭逐惟恐不勝人之心一返而資以爲詩而又敦行孝弟能急人之急視朋友如性命此其所以傑然者本固立矣充而養之漸以俟之不渝不怠追古人於百世之上欲不自異得乎越州前輩文章學問與

武林諸君子時有異同然其能自見者必其特立獨行者也孟昭雖居於杭睠然有故土之思他日尋山問水訪求文獻其以吾言徵之且以驗子之所自得者斯可矣嘉慶九年歲次甲子秋九月吳江郭麐

# 序

讀海昌查伯葵文吾則遜其才讀錢塘屠孟昭文吾則  
遜其氣然二人者並交於吾吾樂交其人不惟其文也  
昔昌黎重以文許人其可者必進之以道學道而後交  
可久文可信也吾寡識當世先達大賢雖爲文自吟自  
喑而未有可喜惟在獨出常等庶幾其古人之才之氣  
者輒交於吾輒賞於當世乃藉以自證焉且覲其一日  
之近乎道而出之茲孟昭刻行卷若干篇將攜以北行  
請益於賢達而伯葵菽原堂集甫鈔刻卽名滿四方四  
方巨公郵書索觀者日月而至則孟昭之見賞也可必  
而吾之藉以自證者更有以信其不誣矣去年冬吾諾

序伯葵之文而未有說以進今於孟昭初刻發之以見  
吾數人之交蓋託以久遠固未嘗汲汲於斯也惟願得  
如昌黎公者進孟昭以道而又何繫於吾言嘉慶九年  
秋八月德清陳斌

# 序

古人以文章之妙喻諸花水何也夫芳華似駛不改妍於故姿峻湍乘焱不遷流於曩瀆然而墜葉零而空條萌逝波往而新漲綠物理相代亦固其所故夫擗擗之病爲優施所譏標竊之詞非篤雅所尚豈不諒哉古人以友朋之誼貞諸貧賤何也蓋窮魚如怨旅雁叫秋一枝吳市之簫半束齊鄰之緼於是贈韋弦於新知尋簪於故吾意氣之盛颺激電流文字之娛波譎雲詭無嵇康不能堪之憤有傅咸不可及之歎然則貧賤之交游抑亦文章之知己乎僕於孟昭十年以長弟畜灌夫一坐之中心驚王粲每當燭花夕泣濤聲薄空雞鳴膠

膠風雨不輟其唱鴻飛冥冥江湖以矢其懷引其吭作  
百年之歌披其肝肅三游之氣琴軫旣希酒悲間作胸  
中塊滿耳後風生窮達之故相關哀樂之懷參半故其  
爲詩如霜竹裂秋朱火歆夏波濤鬱其聽熒徵羽厲其  
節奏由其靈籟自天結體在已文如其人儒兼乎俠夫  
光宅之鐸流姑洗之韻碧池之鐵躍蕤賓之音懷響者  
悅風辨色者嚮燧佳譽自有何假標目特以釣弋之地  
熟其游息歌嘯之侶習其抗隊君苗有焚斫之慨成連  
有刺船之迎識曲聽真滋之媿耳秋冬之交僕將索米  
長安市上孟昭亦將偕計更北行斯時也浴羽鳳池接  
跡麟囿獻碧雞之頌演朱雁之詞孟昭且更以和平安



雅震摠

皇風僕無能爲役矣甲子夏五月海昌查初揆

序

郭頻伽詩清雄查梅史詩瑰麗琴陽年減於二君所爲  
詩則弗減交二君稱莫逆也嘉慶九年二君自刻詩集  
琴陽牽率鏤板旣而悔之然世所傳是程堂詩集四卷  
洋洋灑灑固已凌厲無前矣六七年來遨遊金陵淮揚  
兩寓京師與當世賢豪推襟送抱酬和滋多其間伏居  
里閭讀書岩寺蕭寥曠放有遺世獨立之概一切富貴  
寵利若無足動其心者乃過蜀岡誦參軍賦過涼館觀  
海嶽書過南埭讀荆公詩有餘慕焉方其水行山處櫂  
馬船車襪被盧溝橋大覺之杏花淨業之荷花退谷之  
櫻桃時時繫念若夫衣冠簪紱伺候奔走未嘗汲汲也

昔王輞川畫中有詩後人稱爲詩佛琴隲之畫與輞川  
孰勝詩已寢寢入輞川堂室由翰林改邑令必有實政  
及民宜不復措意爲詩顧哀其近詩八卷疎淡閒適之  
作居多乞余叙而請益焉噫嘻余烏能益君哉吾友吳  
玉松侍御詩人也見余玉延秋館吟卷而曰卷多名作  
惟屠君押韻確當用事真切無意求工人皆弗及斯爲  
極詣陳稽亭虞部嘗曰客能詩余之心客能畫余之心  
乎有則吾將隱焉於是求畫師爲桂門圖二三年春明  
城殆遍一日得琴隲筆曰斯可矣遂乞休詰朝束裝載  
圖如拱壁出國門蓋其詩與畫爲世所傾倒愛慕如此  
吾不知輞川當日有人傾倒愛慕其詩畫能如是否又

不知琴鳴之詩畫能令人傾倒愛慕傳於天下後世如  
輞川否又不知頻伽梅史見琴鳴今日之詩畫亦如吳  
侍御陳虞部之傾倒愛慕歎爲極詣視如拱璧否第琴  
鳴年方壯盛彈琴而治上協時雍於變之庥賡歌而颺  
拜焉其事業當何如也余豈敢僅以詩人期許之哉嘉  
慶十五年春法式善序

序



夫割犀斷鵠始顯昆吾之鋒剔流導歧乃躋龍門之險  
蓋神之所運萬物貫焉志之所凝一誠達焉士有驅騁  
颺歆橫屬今古飛聲宙合之表倚劒崆峒而外牆宇重  
峻而吐納自深波濤震凌而神明益壯其學問見焉其  
利濟覘焉如孟昭者豈可徒以風雅測之也哉蓋其夙  
智早成質行獨絕朋友講習託幽贊於韋絃郡國計偕  
動依遲於定省僕與析奇致亦盟素心經緯人事之言  
習知其英變惻隱古詩之義敦悅其芬芳時復脫畧形  
骸刻露情性頌其酒德信次公之非狂凜乎儒風謂昌  
黎之亦俠比興所寄纏綿遂多蔚乎若人不可及矣旣

而入木天登秘閣與清華之選從鵷鷺以遊洵足彪炳  
文章光顯職業然而神仙在望翰林之地閒方圓可施  
通人之才大業已名題千佛身到三山偶然驥足之煩  
豈謂鳳池之奪卽今大江揚子古郡真州潤飾弦歌循  
行風俗振星衣而趨曉肅露冕而觀風問犢話牛效言  
於農里受書講業比屋於學生耳目潛移風流不替其  
可以助成文雅譜入樂歌者又何如乎僕以舊遊來觀  
新政每遇白沙之路如經愛敬之陂但覺乳雉風馴飛  
鳴音革桑麻被野機杼連房廉讓道興錢刀于焉不競  
萑苻跡絕桴鼓可以息聲夫空谷氣清斯發叢蘭之秀  
幽林露下彌滋芳菊之賞當此靈襟遠接華思忽生有

民物之歡娛無簿書之迷悶伯生老吏之目證以是編  
萊公遠渡之吟卜之他日以爲左證或不予嗤孟昭舊  
刊是程堂集查梅史爲序而行之茲則風雲易道氣節  
倍振以穿溟滓以軋霄崢固由天稟亦資學造從此一  
官一集遞顯其高華再接再厲愈精其灌辟高山大原  
實徵積累僕退飛之鵠見風而歛自愧生平願焚筆硯  
而已嘉慶十九年歲次甲戌秋七月同里吳錫麒叙

是程堂集總目

卷一

古今體詩八十八首

卷二

古今體詩九十八首

卷三

古今體詩一百一首

卷四

古今體詩九十六首

卷五

古今體詩八十二首



卷六

古今體詩七十八首

卷七

古今體詩六十二首

卷八

古今體詩七十四首

卷九

古今體詩六十八首

卷十

古今體詩八十三首

卷十一

古今體詩七十七首

卷十二

古今體詩七十三首

卷十三

古今體詩五十一首

卷十四

古今體詩八十七首

是程堂集總目

是程堂集卷第一

錢塘屠倬孟昭

早春湖上

青山我故人只隔一城住春禽破曉啼招我  
梅開未多殘雪曉猶沍聊岸花前巾忘索花  
四五家一半花間露登登屐齒聲知有沽酒處  
曾遊高躅不可遇笑指青山青還念故人故

西山老僧

頭白老僧三兩箇晨昏誦經了常課袈裟百結病眼黃  
兩日銷糜一日餓編蘆不遮四壁空截木聊撐寺門破  
僧雖習懶不習勤白晝繩牀伸脚臥客來不見具茗飲

倒地石幢支土鏗忽聞老僧起太息城中新建佛寺大  
檐牙欄楯耀朱碧十丈差峩好間架長官祈福競布施  
四方檀那入門賀可憐眼前殿宇頽古佛昏昏有塵泥  
嗚呼爾曹失恒業衣食終年不知價坐逃賦稅免耕作  
更無兒女牽婚嫁自甘窮薄待老死反學吾徒悲坎坷  
人生難得是閒適歲月百年虛放過不見東鄰六十翁  
日日田間曳犁杷

### 白鳥

白鳥飛上梧桐樹黃鳥飛上青竹梢草間索索啄蟲蟻  
繡頸不如鳬鴨驕東風吹花落池水水邊網得尺半鯉  
桐花綏綏柳絮飛白鳥驚起黃鳥啼

湖中曲

花欄鵲鵲銜菱葉長眉連娟暈紅頰湘裙繡撲雙蝴蝶  
不須問郎只問妾橫波醉眠越水濱菖蒲花開長笑人  
誰家子

少年意氣誰家子挾瑟王門老將死金鞭折斷酒壚邊  
途窮哭遍長安市南人歸來向我說三年音書久隔絕  
閨中少婦炊爨屢屢君胡不歸烹伏雌

湖樓曉起

曉霜漸白雞一鳴明星出地光熒熒推窗忽失一湖水  
蘆葉蘆花接沙尾艣聲搖出蘆中烟但聞艣聲不見船  
鄰家開門放雛鴨又聽蘆根聲喋喋

胡秋白

元果

招赴東筓別墅舟中作

鳥語聽來熟分明布穀天飛花黏酒幔淺水護秧田樹  
杪明霞薄山腰落日圓皋亭青一角都載米家船

雨中遊靈石山至龍井

雨中尋山杳如夢變滅烟嵐遞相送林深谷轉至此住  
有似驂騑勒飛鞚接離倒著蠟屐輕泥滑山深與誰共  
蓬頭奴子赤雙脚雨笠敬斜踏寒霧天風吹雨過前山  
一片空青豁飛棟寺門斜抱竹光圓翠羽翩翩集青鳳  
馬鞍山高樵斧響沙盆塢僻幽鳥哢白雲忽向松頂飛  
倒挂松門合無縫紅筇撞破石扇開鐘乳千年溼不凍  
山桃花開澗水紅花片紛紛流出洞浙東諸山我昔遊

五泄雲門真伯仲眼前好景幻難說似讀奇書紛錯綜  
山中信宿歸去來回首蓮華屹不動

題畫竹贈張少府

樂

秋風秋雨吹不散海水怒立爲奔湍龍吟天半虎嘯谷  
萬枝綠玉湘江寒湘江水深不可渡湘靈不來愁日暮  
胸中吐出墨一升眼底忽教三日青我思畫竹如畫風  
大塊噫氣相交融溼雲亂灑不着紙要使森張葉葉開  
玲瓏古之作者誇文同後來小兒弄筆墨慘淡枯澀如  
飛蓬近今好手推鄭燮縣堂揮毫苦敏捷鷺溪百軸供  
迅掃快馬如風追不及一洗陋習出新意不許時人偷  
筆法我今作此亦偶然敢與鄭老爭後先會須更買十

夫好東絹放筆如椽目如電却與此君寫生面夜來風  
雨滿虛堂圖成安得鄭老見

賣花曲二首

長街短街叫賣花秦樓深處第幾家賣花歸來日已斜  
賣花易盡春易老花盡得錢沽酒好明年花開春更早  
長街短街叫賣花誰家女兒鬢如雅鬢邊插花須插斜  
整鬢戴花側鬢顧紅甲輕彈花上露大姑插花小姑妬  
望遠曲

故人墓上花遊子馬上衣衣敝有時好花落人不歸客  
行車脫輻客愁車轉轂車轂令人遠何不令人返

登韜光二首



海氣看不見青山當面來雲生雙足底僧立亂峰堆密  
竈穿廚入虛堂對竹開更邀今夜月清影共徘徊  
幽光闕千古巖壑晝冥冥急雨飛雙瀑空山闢一亭蓮  
花開更落猿鶴睡還醒丹井依然在仙人許乞靈

南屏歸舟口號

雲氣欲成雨萬山都是烟烟開見山色落日又歸船時  
有白鷗影飛來水底天疎鐙出湖口已泊藕花邊  
得友人書有懷

罷馬嘶成骨征人哭當歌鬢毛催日夜風色慘關河書  
抵兼金重愁如落葉多莫嫌身萬里幕府禮爲羅  
節孝詩爲鄭書常徵君母孺人張節母作

雙黃鵠飛飛不相離悲鳴常苦辛苦辛一何極中道失  
故羣滄浪之天胡不聞妾不有夫何有身奈爾呱呱兒  
生未浹旬兒勿呱呱兒命苦上高堂我不欲泣對之淚  
如雨舅姑謂婦且勿悲爾夫之言勿可違行當覆翼孤  
兒覆翼孤兒婦自知之婦爲舅姑無不爲他日兒當知  
之吁嗟乎兒生不見父兒長母復不見兒兒方望母留  
斯須號呼向天母不知母不知手中捧檄中心悲西山  
蒼蒼女貞木夜夜烏啼似兒哭

感興五首

饑鷹骨亦聳病驥聲不暗烈士臥窮巷蛟龍困蹄涔貧  
交在肝膽富交在黃金雖有秦時鏡鑒貌不鑒心

嗜好灼肺肝膏沐毀顏色一日增一愁百年積千億出門念來朝伏枕籌往昔十步阻視聽役役神智塞揮鋤見黃金智者亦已惑仰面瞻飛鴻彎弓射不得

夜殘月魄死寥寥衆星稀寒螢聚深谷奪月爭光輝狂雷屯大壑下有融風吹列缺掣中天羣陰燭無私至人鏡萬物以天地爲師神奸猶遁迹況此熠燿微

登高無蔽虧坦懷無不平壯士一卑伏擊筑不成聲馬周客常何上書天子驚當其辱浚儀乃受崔賢輕

歲晏風雪虐門巷車馬絕哀哀南飛鴻獨叫寒雲裂庭中植蒼筤厥性堅多節太息牆上蒿榮枯眼中別

鳳凰山懷古

日夕登古原天低四郊曠黃雲海邊起風沙兩摩盪龍  
山亘西迴鳳唳環北向到江青連紆勢直趨秦望懷哉  
古吳越嚴城一何壯負販起英雄兩浙資保障百年霸  
業歇望氣知不王當年陌上花空聞小兒唱如何建炎  
初乃復臨天仗草草就偏安國是壞奸相李綱屢左謫  
陳同未弭謗始撤兩河兵終失汴京望望祭虛有名燕  
游盛供張賜第連衢飛樓跨青嶂笙歌未終夕馬丁  
禍先釀杜宇哭冬青白雁來江上至今穆陵土頭顱幾  
遷葬惟有兩峰雲風吹自來廷

山窗坐雨

雲深山紆回烟斷路重複雨氣日夕昏長林鳥飛獨孤

鐙動微茫隔水見茅屋江岸人家稀濛濛聚花竹竹外  
繞炊烟不辨山影綠無事此坐忘經聲出叢木

吳山觀潮同奚丈鐵生汪楓谷湯點山陳秋堂裘  
芑雪作

江流失鎖鑰濁浪雙壘攻乖龍助聲勢飛落秋濤宮百  
里忽掉尾逆折嚴陵東瞥如靈旗翻勁若箭脫弓鬼兵  
接短仗出沒洪波中只恐元氣洩呼吸地肺通靈鼇駕  
山去海上留一峰落日湧波沒倒射光熊熊饒鯨吐光  
怪蜃氣噓玲瓏似鍛五州鐵鑄出金芙蓉須臾鼓聲死  
仰見天宇空殷殷猶在耳笑我如聾蟲却立神氣沮淨  
拭雙青瞳想彼造物偉未是羅刹凶鑿破混沌竅一洗

泥沙壅好待明月照江面磨青銅

題浣江村店壁

句無城外秋水濶句無城頭雨初歇浣江不見浣紗人  
片石城南紫苔活深林晝啼山鷓鴣划船拍岸呼賣魚  
十八女兒坐船尾脚踏雙槳如飛鳧三三兩兩出橋去  
都向鷓鴣夷廟邊住

自暨陽入山陰

飽挂輕帆去西風到若耶孤峰塞湖口小艇出蘆花笑  
我仍吳語何從問浣紗兒童水邊立深樹是鄰家

夜遊柯山坐龍潭石壁下

攢峰夾陰竇仄步十里長空林插危石奇鬼獨立僵頑

鐵礪鋒鋸活竅吟宮商枯苔濯元髮凍乳凝天漿迴厓  
中斷裂石甕豁閉藏澄潭出凹腹慘黷夜氣荒羸蝨緣  
壁黏觸手滑有光捫攬猿猱舌胡氣不揚仰見缺月  
升寒星墮森芒潛浪翻百尺搖兀角與亢長松屢磨颺  
蒼鼠紛跳踉朔風穿耳過列炬焰忽張南望寺樓聳叢  
木圍短廊寓園久已廢祁忠愍公讀書處野獸穴壞牆投賦未敢  
弔欲去神屢傷似聞精靈語恍惚不可詳

### 蔡山高

神之靈融光災市人怒神不來蔡山高坼神屋神不靈  
老嫗哭

贈沈筠虛秀才

星然

用昌黎山石詩韻

茅堂秋色橫翠微晚鴉作陣湖上飛湖田八月早稻熟  
活鱖出簍雙螯肥故鄉故人兩相憶會面動輒經年稀  
牆頭過酒不辭醉甌中炊飯足療饑比鄰守望現相助  
往往出門不掩扉君家住我草堂北薜蘿塞戶遮烟霏  
階前許打新棗赤園裏共看修竹圍有時更上後山脚  
西風吹鬢涼入衣君如野鶴自長往我似怒馬不受羈  
東山白雲恐相笑未可便踏山月歸

靈鷲寺

尋源入溪口忽復轉河山萬壑生春水長林橫石關佛  
鐙隨月上飛鳥先人還余亦刺船去梅花第幾灣

立春日書事



霽日動林木宿雨明高軒林鳥時一轉春色忽到門  
蘭晴窗下生意發朝暄池邊兩梅樹歷亂花枝繁  
欵門來故人執手心所歡爲言東浦至遺我臘酒  
渾鄰里昔婚媾飲食能相存獻歲百事樂高會言  
辭溫酌言分僅僕大斗寧復論

### 東城步月懷友人

虛堂散陰籟芳景集暮春迴飈盪積靄四顧天無雲  
日夕理輕策散步城東門東門千餘室竹樹淒以繁  
月出照江潯沙沒寒烟昏環郭四十里各自成一  
村西園雜冠蓋南樓酌清樽歡讌撫時節招隱懷  
邱樊悠悠望長路莽莽眺平津流光各千里不照  
客子顏何由通情愔

別離情所關關情感新樂况復已故歡

循陔篇爲問山先生作

朝陽下崇岡光輝常不移嗟余猶孩心歲月已西馳厥  
草何油油油油復離離朝發葳蕤華夕成零落委零落  
殊未已言采南山陞憂來不可掇去去復何之今人與  
古人千載同其悲

南風日以吹衆草日以芳睠彼庭中蘭中心何徬徨中  
心一以結悲來不能說進我盤中餐亦已馨且潔行行  
上中堂素縑爛揚光長跼欲進辭芳華非昔時

聖果寺

秋氣一山老亂松搖夕陽江雲到門黑沙磧抱城黃霸

業銷吳越琳宮壓鳳凰舊時歌舞地一半臥牛羊

雜詩八首

法吏知爲儒羣盜知爲農日月燭陰昧海隅扇仁風幸  
際邛隆世笑謂田間翁我有白璧雙願持獻蒼穹藉  
以錦繡段承以珍珠籠可以並元珪可以侶黃鐘可以  
薦明禋可以昭德容黃帝與重華天地無終窮焉能久  
市廛吐氣如長虹

丹霞夾飛樓天門搥大鼓霓旌導前行白虎相對舞仙  
官肅威儀影纓曳華組雜沓軒蓋來中有舊時侶下士  
墮九關却立不得語何當躡雷霆上訴民疾苦

大瓠空其腹乃能泛江湖神龍蟄其身乃能行九衢遵

路無險途登高無疾趨徇名鬻其真作達難爲譽崎嶇  
感世路去去安所如大隱隱朝市潔已徒區區

禮閑不可踰潔身匪爲名邂逅桑下女黃金誰汝令妾  
有雙明珠絙以朱絲繩纍纍貫不絕似妾纏綿情纏綿  
何時已賤妾身自輕

曳裾王侯門出入耀鄉里望顏伺歡笑側耳承意旨刺  
滅慚禰衡金多豔季子不見姜伯淮屢詔乃不起

古人不可作來者不可知良時每易失大道安窮期寒  
夜風蕭蕭吹我庭樹枝聲多靡絕響葉落無還時萬物  
竊天慧不能齊盛衰遷轉在須臾宿土萌根荻感此亦  
何爲古人先已悲清霜入秋鬢草木同恩私

東雲泣寒谷層冰絕奔湍驚馬踏霜草陰厓悲風酸吁  
嗟遠遊子自古行路難但爲衣食故長使別所歡十年  
傷離別念君衣裳單衣單還復紉涕下不得乾  
人生各有趨役役感貧賤魂夢中自勞物我兩交戰利  
械神智昏巧思頭目眩失意對兒女歡笑強顏面嗟我  
涉世疎拙魯愧時彥豈不慕富貴得失匪所戀

宿北一山房同江石如范小湖

山光四圍合暝色浮林端人在萬山裏溪泉夜生寒丹  
厓閉精舍孤雲盪層巒枯僧對趺坐萬籟寂不喧巉巖  
敞北牖鑿石通爲門中有寒猿號聲咳山下聞棲遲迹  
偶寄心賞難自言愧爾山中人高臥山中山

山犬吠生客客起還掩扉蕭蕭古松樹吹落藤花稀淵  
渟雲駐影石突蘿牽衣曲折繞池走磴滑苔露滋冥搜  
啓良悟隨處止亦宜只恐微徑窄草木森刺肌  
昨向雲外來却入雲中臥僧樓四壁風獵獵翻瓦過石  
泉滴秋雨夢醒山月大一尺寒似冰清光壓愁破山深  
谷應暖歲晚客多暇會當縛一椽隙地僧可借

山行口占二絕句

肩輿出入亂山裏足踏高下青芙蓉夕陽在樹雲在嶺  
玉女笑人何處逢

三家兩家各村落十里五里聞鐘魚夾隄澗水流活活  
蓑影一肩人荷鋤

燈花二首

花影分明鞦一枝銀缸蠟焰未灰時薄寒中酒話連榻  
小院無風人對棋何處夢回新步障忽驚春釀軟琉璃  
未須暗卜金錢字好傍紗籠悄祝伊

小顥離離絳蠟扶如烟如夢總模糊長門秋夜怨銷骨  
蕭寺佛龕寒抱珠占食明朝須記取行人前路却知無  
亭亭風影沈沈夜漫剔銅荷喚女奴

題畫梅

粉花如雪落紙輕縱橫老鐵枝倒生攀花一笑墮仙子  
白月茫茫半江水水深月大夜色寒照見花枝江上殘  
却憶去年風雪裏水仙祠下獨尋看

得伯韓睦州書却寄

顛顛江天秋思生  
鷓鴣灘下待潮平  
鷺賓鷺客夜同夢  
野水荒山人獨行  
投轄陳遵原愛客  
處囊毛遂未知名  
何當歸向田園老  
料理頭銜署耦耕

南唐雜詠四首

承恩姊妹入深宮  
葉子新編內苑中  
一曲念家山破就  
丁香愁結小重瞳

書訣妙參鍼鐵聚  
雲鸞新展簾文開  
澄心堂紙司文印  
若箇曾留諫草來

新聲邀醉舞婆娑  
安金屑琵琶正踏歌  
何似秦淮鳴咽水  
瓦官流出哭聲多



黃花水落渡京江十萬樓船繡戟幢一卷江南歸命帖  
換他內庫酒三缸

秋嵐效余作花卉數種戲題其上

孫郎論詩得畫意風華欲歛筆欲圓咄爾狡黠幻斯技  
落落更向縑素傳數枝秋色淡沒骨一拳頑石青浮烟  
寫生不學宋院體當在白石青藤間古人六法信不苟  
嗜癖有癖君其然漢陽老守劇珍惜一紙要賣千銅錢  
題撲蝶仕女圖

春風吹花花滿池紅女死作長相思花枝蛺蝶蹴花落  
翩翩隨風吹又却湘簾沈沈壓銀蒜美人含愁隔風幔  
雲鬟低鞦絕可憐下階却立花間看徘徊弔影東復西

香魂疑怨粉翅低手中團扇困無力花梢刺袖行來遲  
腰支忽轉身手好小撲花闌度花杪背立銀塘凝睇斜  
夢雲却向梨花繞

送友人

得失何須慰塞翁扁舟南下竟匆匆驪駒賞出風塵外  
別鵠愁翻夜雨中我輩聲名山上赭世人憂患壁間弓  
浪傳目聽亢倉子笑比鴝鵒撮蚤功

郊行

漫騎羸馬此經過郭外青山日未舛獵獵西風振林葉  
漫漫白水浸秋禾自饒鄉味魚鰕美愛逐村翁鬢髮皤  
沙戶無多城市遠縣中江米問如何

蘇小墓

剩有一抔土于今幾百年秋風落紅豆吹不到重泉

南屏看紅葉同孫秋嵐汪仲房范小湖

秋林雜丹黃淺深不一態西風梳落葉空翠隱其內人  
行秋色裏山在夕陽外孤鳥側身下烟光忽破碎寺門  
正當湖日與兩峰對微徑通城濠疎鐘出水埭意行隨  
所憩目炫不可畫湖水白如雲又向樹梢挂

對菊三首

晨風動階砌疎枝媚日永園丁荷鋤去朝陽見人影花  
低露猶瀉鳥去籬自靜繁蕪勤芟夷孤標得修整坐對  
茅檐下塵慮良獨屏感此生意微瘦蝶抱花冷

寒花犯霜發幽芳照園林開軒偶延佇秋氣亦已深衆  
草日以歇芳華謝難任孰如陶彭澤而能抱冬心清賞  
愜終日采采成孤吟

嗜酒不強飲薄酌亦成醉冉冉月上牆錚錚葉墮地晚  
鮮摘盈把衣袖寒露漬病骨秋未蘇所需惟藥餌菊英  
甘可餐治地種不易分苗劬春雨汲水灌秋霽細蟲蝕  
其根所活亦無幾辛苦終有成且勿感顛顚

枯薪歎

悲風振墟莽白日盪昏曖窮巖絕壑中梗楠十圍大狂  
雷震其顛野火燔其根養此數百年旦夕成枯薪樵蘇  
尚勿及梁棟更焉論未報天地私卒負雨露恩道旁白

髮翁謂我殊不然兒時見此樹膚活理不堅大匠審材  
用取美不取惡雖具輪囷姿曾不中櫨櫟

古意

馬蹄不能方車輪無四角要知賤妾心君看曲江曲

青溪書院十詠爲少司寇王述庵先生作

湖光積高靄帆檣動行色日落青溪紅烟波淼無極瑟  
瑟藕花風扁舟送南北

青溪一曲

高樓納嵐光吟眺無已時窗外環五峰一一拱向之長  
松動高吹習習風來遲

五峰拱翠

城頭壓萬井古堞參差浮高樹滃停雲比屋梯危樓借  
問陸機宅而今還在不

雉堞連雲

浦溆忽已窮不覺遠村暮炊烟墟里通人家雨中樹狂

歌招隱詩晞髮秋原步

烟村杳靄

飛鳥不可數半江吹斷雲吳淞一幅水秋色已平分歷

歷認天際歸舟迎夕曛

遠浦雲帆

先生世宗匠房杜皆北面入門桃李花春風座上見倘

許振衣從橫經後羣彥

禮門桃李

惠子藏五車字字皆蝌蚪芸葉無封塵縹囊足富有老

龍夜叩關知公家有酒

芸釵小閣

秋空障梧影獨立中庭前明月不到地碧雲流滿天下

有問字者停車叩草元

講院梧陰

鹿洞通德門曠代各樹幟經學何紛綸門戶後來替敢

執同異辭斯文未墜地

層樓釋末

孤標拔地起諸天散花立雲氣鬱青蒼飛檐繞馴鴿夜  
半風力微鈴聲雨中濕

紺塔凌雲

曉泊西陵驛

清霜被長坂曉色下寒渡隔岸雞亂鳴愁心挂烟樹柔  
艣逐輕鷗搖入前溪去

題畫絕句十二首

數弓老屋支秋水幾箇漁樵繫釣船短短笆籬遮不斷  
青山飛落草堂前

未放詩情鎮日間便從畫裏寫春山山迴不見谿雲起  
亂擁桃花打槳還

依依涼月到池臺紅葯闌邊一半開花影無人留粉本  
淺深都上女牆來

畫眉啼徹富春山一夜桐江江水寒五月鰕魚江上賤  
綠陰深處好垂竿

小結團茅隱薜蘿松門斜傍水門多何當拄杖沿流去  
橫吹聲中起棹歌

六法於今更屬誰冬華盦主足吾師年來不寫黃公望  
便擬襄陽米虎兒

生綃八尺倚高寒解籜風梢欲畫難只恐漁樵生計薄  
滿山都種碧琅玕

捲幔江亭一色秋秋光亭影落江流水流不去瓜洲樹



一路浮沈到石頭

嫋嫋西風青竹竿翩翩水鳥蓼花灘  
淡雲疎雨無愁思寫出秋心總一般

烟水迷離一棹回遠山濃綠溼成堆  
不知寒雨渡頭急有客敲門送酒來

白鷗身世等浮家不住山涯住水涯  
艇子載將明月去晚涼時候泊蘆花

南枝北枝花亂開花開却值故人來  
明朝欲別無多贈畫取橫枝不點苔

卽事二首

叉手當門立仰看天際鴻溪光沈暮雨  
帽影怯西風土

銚寒烟直霜郊古木童牆頭過白酒一笑款鄰翁  
鄉里愁漂泊家人幾播遷酒邊看短劍鐙下說殘年舉  
世貧無賴吾生私自憐蕭條計生產老屋十雙田

還錢塘兩日復又渡江舟中寒甚

百事真難掃嚴寒又越行到家纔兩日中夜此兼程沙  
淺冰初裂舟輕浪不生天風知釀雪乾雀凍無聲

悲來三首

并序

鬼域同人羣難間作歲暮抵家百事粗了賤子  
感而作此有戒心焉

悲來欲語氣不伸拊膺結轡勞我神儒生百事落人後  
咄爾橫逆加鄉人窮冬坐愁霜雪虐濁酒不澆涕淚真

安得手挽六龍轡一照顏面回陽春

幽宮八尺土未乾禍生倉卒奸民奸揮鋤立見草木盡  
境垣寔石摧不完鵲鴿同難兄弟少鳴鴉毀巢骨肉單  
銜冤生死付一哭我生無力號上官

放翁本願守墳墓嗟我不得故鄉住山中豺虎縱復橫  
羣兒打門深夜驚昨朝歸來空護惜北風凌厲歲時迫  
長鬚且休更下狀但理牀頭破書籍

結交行贈范大

崇階

古人交情澹如水與人結交爲人死今人結交膠漆同  
膠漆雖好交不終今人動輒稱古人古人已死肝膽真  
肝膽可眞即可剖交如古人眞不苟我昔與君稱結交

里門出入俱垂髫卽今交好似君者屈指一終寥寥  
我爲結交行爲君一再誦古人交已難賤日豈殊衆耳  
餘紛紛終可惜車笠相要有何益

是程堂集卷第一

嘉和廣中茂祿開  
雖弘真州府舍

秣陵陶士立仿宋書王日華董刊

是程堂集卷第二

錢塘屠倬 孟昭

讀書自述二首

布帛足取暖紈綺爲不溫讀書貴適用萬卷安足論諸  
子紛駁雜於道未爲尊聖賢不同迹申韓亦有言泥古  
道則悖徒法行已難君子識時務操約重反觀勿以詞  
害義何有持兩端思窒神明通中有至理存

不寐夜苦長思極神亦疲中心偶有得不能吐一辭內  
省疚昨事爲學耻後時少年氣未充躁發語多歧頗亦  
發深悔輒復成阿私覽觀任所喜遷徙無常師譬如渴  
思酒不擇醇與醜瑣屑事章句終貽學者譏

哭汪仲房秀才 夢心

百歲何草草青春幾時好青春有時好少年幾人老君  
不見金天西白日沒東海頭又明月日月相催曾幾時  
有人地下成枯骨蒼蒼者天悠悠重泉枯蓬轉地迴風  
旋鬼伯磨牙利人死倏其入室窺人眠青鐙熒熒雜鬼  
火黃狐跳踉牀頭邊更有惡梟啞啞夜半羣集而悲鳴  
厲聲嚇鬼鬼亦驚曉來愁雨晝不明晝不明悲風起千  
年陰氣中人死今年死者遍鄉里寡婦哭夫父哭子時  
疫大行仲房竟以是疾死哀哉仲房亦罹此幼年失其怙前年喪其偶  
上無弟弔下無子堂上大母與母耳驚魂兮無歸煩冤  
兮訴誰念君生爲豪士歿爲靈鬼吾將爲爾歌楚些詠

蒿里重增君痛歌，且止君不見文章自古造物忌。十二  
萬年亦如寄，君且樂兮夷猶更何爲。今不得意不得意，  
淚如雨，可憐杯酒澆黃土。

夜坐吟

廣庭夜張宴，哀樂誰能見。朱絃操曼聲，聲音忽中變。風  
淒淒，羅幕西紅粧掩銀燭，低坐空房泣孤嫠。沉沉冬夜  
淚如雨，歌聲不長聲太苦。

古怨辭

柳絲吹嫋嫋，長條一何好。楊花飛漠漠，東風太輕薄。妾  
身如楊花，飄泊落誰家。妾心如柳絲，纏綿無已時。

題畫雜體呈大中丞阮雲臺先生

文待詔栗里圖

落落松下人脩然背門立已遂山澤招大好形影答想  
當還舊居稚子歡喜集或行下溪田歲功固所急況值  
義熙還運窮心目讐猛志逸四海少壯已不及悠悠撫  
時運去去返鄉邑不作獨醒人時見酒巾溼卽看荆軻  
詠慷慨雜悲泣知公有心哉千載展圖揖

周東邨柳塘洗馬圖

漁陽城頭吹簫策健兒如風牽馬立玉河橋邊秋水深  
健兒紛紛驅馬入周郎畫馬能畫骨骨力開張氣先奪  
躊躇老驥未騰波先遣兩駒試龍窟一人牽馬立水中  
昂頭軟脊蹄四空後隨一馬高一丈健兒翻身不得上



秋風瑟瑟吹短蒲水邊白楊一半枯枯椿側更繫一馬  
一人執刷立馬下驂駟騾裹未可知座上驚看失真假  
後馬擁波沒前馬踏波出二十馬蹏蹴浪花團作紅雲  
肉駿活直似騏驎地上行幽并壯兒不敢叱嗚呼幽并  
壯兒不敢叱畫上生駒騎不得誰見真龍渥洼出

仇實父桃源前後圖

武陵桃樹何時栽太元漁人知爲誰花開花落六百載  
世間尚有漁人來老漁見花不見路舍舟一逕尋源去  
青山塞路溪忽窮沿山轉入花深處花深路絕觀者疑  
畫師經營故作奇翻愁靈境不可到但見白雲橫翠微  
前圖未竟後圖作前山從隆後山削呀開石洞別有天

萬樹桃花抱山脚蒼蒼雲樹半桑麻仙源一路都是花  
花外溪山花裏屋小橋流水通人家居人問訊歡如昨  
各復相延入村落漢晉從前說廢興鹿馬至今傳約畧  
此中人亦殊有情家家雞犬馴不驚神仙海外本寄託  
風俗人間原太平我觀此圖歎奇絕鉅手一一皆有聲  
誰其記者陶淵明書此記者停雲生

上有文衡山  
書桃花源記

作圖者

誰江南之仇英

題王尺魚

振綱

有竹山房圖

秋風作秋秋氣肅琅玕夏夏響琴筑孫枝擎雲影搖綠  
老龍欠伸睡未熟君家子猷頗不俗但愛此君不食肉  
屋前屋後無處無千竿萬竿看不足却笑文湖州胸中

有成竹清貧太守亦太饒  
倔強槎枒撐滿腹腹中有時  
出芒角往往濡毫筆頭禿  
我今爲君作此幅風枝雨葉  
隨手觸中間更著一茅屋  
置君此中不一粟圖成呼僕  
遠寄將換得餘杭酒一斛

拂塵庵題壁六首

萬株松樹抱江城檻外風帆葉葉平  
紅日半檐山一角晚潮如雨送江聲

繙經許我獨登臺習靜禪關夜不開  
明月滿城春似海笙歌吹不上山來

藥裏經春滯病夫半年曾不到西湖  
踏青詞寫烏絲格寂寞寒鐙夜課奴

僕人柳埜日  
受唐詩一首

蕭蕭寒月挂疎藤何處鐘魚最上層暮色到門看不見  
萬家烟樹一篝燈

濤聲日夕到城隈有酒何人共舉杯好待月明江路白

隔山叫過蔣村來

時蔣村讀書  
吳山道院

故人遺我新笏碧日日花前倒一甌醉後翻教無一字  
如何喚作釣詩鉤

### 奚丈鐵生移居賦贈二首

巷曲蝸廬靜不譁安排小築補冬花新詩丙後無多稿  
老筆年來又一家過眼雲山都幻境半生兒女似搏沙  
比聞禪榻成枯坐細雨簾櫳好鬪茶

落拓風懷中酒時相逢鬢雪已絲絲如君海內幾名士

投老江南一畫師白眼不容通刺謁布衣隨分與時宜  
杜門再見林高士除却梅花未許知

口占

小別輒相憶青山殊有情高歌豈得已僮僕不須驚

病起

病起更何事亦知春已歸鶯花等閒過人事重相違醉  
擊鐵如意愁聽金縷衣琴尊無計遣惆悵故人稀

贈何徵君

琪

何休老去滯邱園白髮

三朝大雅存姓氏苦辭徵士列文章從古布衣尊乞書  
價重新羅客高隱名傳枯樹村前輩晨星今落落日鄰

還喜有陳蕃

謂三西陳丈

老入歡場興未乖  
中年歌哭酒難排  
荷衣竹笠頭銜稱  
郭北湖灣小住佳  
風雨只愁茅屋破  
饑寒偏動故人懷  
扁舟破曉還相訪  
苜蓿堆園水浸階

吳山酒樓同父積堂

三慶

捲幔平林接暮烟  
江湖蒼莽落樽前  
山坳樹黑雲歸壑  
沙磧潮平水拍天  
未過重陽秋更好  
况逢新雨袂初聯  
欹斜烏帽風前立  
笑插黃花一放顛

訪鈍鐵翁于江干青雨堂

近水結團茅  
青埤萬竹交  
秋聲來郭外  
江色帶林梢  
涉世成通隱  
全身似繫匏  
款門應不避  
熱客漫相嘲

題鶴澗圖圖爲高邁庵丈

樹程作

行行石梁上長嘯揖蒼龍鶴唳不知處秋山第幾重天  
風吹短袂回景落寒松快讀房山畫伊人一笑逢

觀潮

獵獵北風號城根截怒濤樹驚秋葉脫樓擁暮山高慷慨盡卮酒時還吟楚騷文章羞袒褐意氣爲誰豪

客有詢余所居拂塵庵者書此示之

高士坊前第二灣路隨修竹到禪關城根曲抱西泠樹  
江面青浮北幹山仰看星河天四角不遮風雨屋三間  
漫勞車馬時相訪只恐閒雲嬾未還

移竹補種翠玲瓏山館依韻荅鐵生丈

最憶蕭蕭解鐸聲  
女牆黃石未寒盟  
竹分上番看都活  
人與此君同有情  
隙地數弓春雨足  
茶烟雙鬢午風清  
草堂詩乞縣州竹  
贏得人傳韋續名

石子岡暮歸

短檐落日尚依依  
石子岡前信步歸  
秋晚山田高下熟  
村深茶客往來稀  
水邊合掌一僧立  
雲外聳肩雙鶴飛  
黃葉蕭蕭如雨急  
運租船到打柴扉

懷家禹卿兄秦中

茫茫四海一身孤  
風雨漫天逼歲除  
馬首秦箏彈老淚  
關門越客下單車  
堪憐幕府依人計  
重展天涯隔歲書  
書上殷勤託鄉使  
歸期曾說雁來初



寄心梅

又添歸思入新年擬趁西興渡口船  
春水一篙三日雨梅花十里萬山烟  
比鄰酒熟排宵醉羣從才多愧汝賢  
況是燒鐙時節近題詩應寄草堂前

上元夜登鎮海樓望江

統統漏鼓晚來催却望春城未肯回  
雲影欲流山影去江聲還挾雨聲來  
闌干百尺凌虛落屈戌三重徹夜開  
海上魚龍春寂寂絳雲何處是蓬萊

春暮雨中漫興八首

竹梢輕響筠粉滑花片墮地春泥香  
小園無事坐移日雨過不知衣袂涼

綠陰如幕四圍遮  
閣子三間傍水斜  
稚子擎來新剝果  
侍兒數遍未開花

芥壁汗牆仕詆訶  
鞮材依舊積逋多  
小蓬萊墨

黃大小松所製子曾

乞得數枚

紅絲硯

舊爲奚大鐵生所贈

寫出黃庭不換鶩

筠籠分焙碾新芽  
折脚銅鐺煮露華  
多謝山僧循舊例  
及時爭餉雨前茶

科頭獨坐亂書堆  
門掩蠅蛸畫不開  
只有巨卿能踐約

湖調小

衝風衝雨過橋來

青油傘子登登展  
閒過冬華細討論  
輾轆門前車馬過  
此翁無事不開門

送春歸去一程程  
忙煞啼鳩惱煞鶯  
白白朱朱開未了

看花最好是無名

積雨春來逢甲子溝渠汨汨拍階平  
天公畧放斜陽出未過黃梅不算晴

經田家作二首

五日一頓有花豬買盡村醪更買書  
如此清閒消受得愧他辛苦把犂鋤

幾畝荒園未拋却豆苗纔種種  
王瓜殷勤且竟斯須語老圃老農吾一家

夏夜坐池上

衆星灑可掬水底月倒生  
沄沄微波起魚蝦鏡中行  
泉冷滌熱腸淵停鑒虛形  
散坐不巾襪快意宜晚晴  
垂柳

拂烟條風荷漾疎莖茶鑪竹間沸一盞聊自傾良夜足  
可惜懶情誰當懲積書紛几案觸之昏睡生回頭見稚  
子草間捉流螢來朝恐復雨虛堂閃雷聲

奚丈鐵生趙丈素門次閑喬梓陳秋堂汪楓谷襲  
某雪胡秋白拂塵庵小集二首和奚丈

關風伏雨殷輕雷竹裏行廚向午開折柬乍呼奴子去  
晚涼同約故人來評量畫格參詩意吐納山光倒酒杯  
最好談經趺坐處門前雙樹長莓苔

短籬疎蔓引牽牛際晚西風已作秋僧院爲賓多貯酒  
山居無暑却登樓一更江月隨潮上四壁溪雲似水流  
屈指已成前後輩無慘重詒卅年遊

奚丈云舊曾與友人結  
夏於此蓋已三十年矣

述懷二十四韻示小湖

月黑無留影古樹逼人立癡雲壓窗重暗蟲咽風澀燈  
前擲劒起酒酣話連榻悲或從中來往往歌當泣天寒  
衣履敝綈袍易爲德路鬼多擲掄拘儒引繩墨意氣古  
人重壯懷百端集擾擾名利途取舍兩不得生平習詞  
賦耻因狗監入量力守故轍朱履何門跋蕭然臥窮巷  
荒落感學殖妄冀文字傳漫笑富貴逼及今高堂健婚  
嫁非我職饑寒迫不知筆札尚能給貧交二三子迹異  
萍水合衡宇遙相望杯酒時作荅座右列經史談論差  
不惑往讀馬班言撫事心若盡利祿自有階儒俠來可  
襲却嗟韓彭誤正坐功利急今夏憂旱暵赤地千里接

傳聞荆襄賊骸骨溝渠塞懷古哭古人同學笑不識生逢

堯舜時那得常默默

題查梅史

初探

麗陽行記後

故人前度去江上此揚舲葭莩迷鷗夢蓬窗落曙星歌聲雙嶺合水氣隔山腥爲說流亡者淒涼不忍聽有客哀新塔爲誰陳苦辛縣荒多被水鄉僻少逢人風雪催行李艱難媿此身茂陵多病後文字未全貧

題友人齋壁

巷無車馬跡門有水禽啼疎樹不藏屋閒雲方過溪圓萍如客散矮竹與兒齊落日西陂好琴尊許共攜

陳丈二西過訪畫竹數竿而去卽次所題句韻報之

綠陰忽到天清風正亭午牆角臥癡龍秋聲昨夜雨

開軒坐明瑟正對青琅玕蕭郎老可惜師竹想高寒

先生齋名爲丁龍泓隱君書

### 靈隱補梅軒曉起

山禽無數啼曙色上窗紙春山落花靜長林曉烟起鐘動飯淨侶松瓢滌寒水乞火齋廚下煮茗深竹裏開卷讀佛書澹然有餘旨却如看山心淺深隨所喜

施石樵

紹武

黃海樵

孫燦

句湖

孫瀛

江聽香

步青

朱閑泉

壬

蔣蔣邨

桐

過訪山庵看月

人影雜松影尋月如尋秋月色與江色浮動城南樓山  
居坐成寂聯袂慰獨遊林梢初過雨晚蟬啼未休主人  
故愛客有客皆羊求更喜我僕頑拱立殷勤留山意晚  
較寒竹風清以修急呼杯杓共尚可襍被謀茅庵東南  
偏正對大江流潮聲撼窗戶搖兀如扁舟散步出簷外  
已立雲上頭顧此興不淺詰旦新詩酬

風雨交作百感紛集拉雜書此了無次第

七月行已半溽暑時將殘風翻樹枝折雨洗雲容乾乾  
雀巢枝巔履危始得安人生歷險地那得利盤桓衆流  
爭一壑激之成怒湍不識溝澮盈敢測江湖寬君子慎  
寡默常塞兌之門志士貴獨立千金不市恩



暨陽山中先人敝廬在焉歲時還越得與諸伯叔  
昆弟飲酒爲樂凡所歷覽各以五字絕句紀之  
得十八首

琴川

卅里琴川水寒潮直到門方今太平日不似武陵源

琴隴舊廬

萬山迴合處深谷少人烟留得茅廬在於今六百年  
葫蘆嶺

十里不見人但見松影直徑轉松亦轉半松半山色  
金牛嶺

樵徑盤山脊陂陀折幾迴金牛不可見雲氣萬羊來

蔣寺嶺

劫火成今古溪藤不可攀言從蔣寺嶺遍歷暨陽山

店口

微月澹昏黃肩輿出店口緣溪十畝桑當門五株柳

屠家塢

山居不厭深耕讀交自勉日夕飯牛歸浩歌下長坂

故園讀書處

樓居面山起溪流抱山止更有還山雲飛落硯池水

石臼岡

我來遇田父歲晏方築場相期春草綠還登石臼岡

鶴叫坪

時復攜五絃來就知音彈一聲孤鶴唳清夜露漫漫

鯉魚岫

叢林閉深邃下有蛟龍潭一半在山北一半在山南

象山

溪流抱柴門正對象山麓只合便移居歸雲盪虛谷

乾嶺

仄徑穿雲直陰崖背日開越山千萬曲一曲一低徊

獅子峰

巨石作獅蹲長松作獅吼瀾漫雲氣多不覺秋山瘦

朱塢

炊烟隔山起雞聲唱雲表絕頂一茅茨流雲半窗繞

澤泉

各自成村落東泉與西陽中隔獅子峰相去不里許

東松嶺

積雨散空翠嵐容斂餘霽古廟寂無人松門暫留憩

紫巖

巖石綴紅樹枯藤繚繞之遲徊動行色正是出山時

自暨陽入山陰登臥龍山看月

耽遊苦無厭一日一山行侵晨度北嶺薄暮抵南城朝  
嵐雲陰重夕風山氣清振衣厯危磴招邀得心朋長松  
鬱森列其上盤蒼鷹孤亭翼然開合沓連峰冥鑪峰出  
當面咫尺雲氣縈雲氣積復散華月澹還明忽照萬松

頂化作蒼烟青是時雨初霽積潦亦已平茫茫湖水白  
淼淼烟波輕茲遊豁襟抱久滯忘歸程遠夢落山外月  
缺參旗橫

柯橋夜泊

引杯看落月索火聽敲冰襪被孤舟宿嚴寒一夜增人  
聲喧野渡霜氣入寒鐙吾欲求長筵中郎得未曾

吼山觀雲石復徧厯水石洞諸勝

吼山之奇莫奇于雲石危峰壁立千仞強高矗天半作  
天柱上視平砥角四方片雲垂垂忽飛下欲落不落空  
中颺不知何年化作石位置妥帖懸中央巨靈有掌擘  
不得不藉神工況人力霹靂橫將石削平大峰小峰顛

欲踏天然輪爾斧鑿痕石根觸雲雲氣出戔戔拔地土  
不封仰視周遭不敢逼緣山復行迤西去畫地龍湫勒  
山住瞥見橫空走石梁不許飛仙等閒度石梁中虛石  
室開百尺妙構空中臺懸巖急溜瀉山腹下注潭水澄  
纖埃山僧結屋當林垌窅然巖壑圍雲屏梵聲清越裂  
石響長風遠引高秋旻想彼造化妙入神搜剔毋乃非  
天真混沌開闢不到處此山乃以琢削成嗚呼此山乃  
以琢削成不讓金庭洞天浪得名

秋白小湖以二月一日至拂塵庵時余將之山陰  
未得偕承寄書問訊書此答之

翰君先入山高臥白雲間對榻此良夜脩然知閉關春

風鑑湖曲孤權我將還杯酒勞相待歸期詢白鵲

十載成知己傾心能幾人生平重離別不敢試風塵

時方

不赴梅柳經春發江山著眼新茅庵風雨夕感慰寄書頻

### 荅客嘲

苦身檢約張伯松放意自恣陳孟公我廁其間兩不得  
陸沈于俗將毋同紛爭蝸國笑觸氏沐浴太平頌轅童  
且學道華不釋卷仙人天上無愚曹

同家怡亭廿八兄流山二兄璇源珉源二從姪鑑  
湖夜泛

青山抱明月林深受月淺不如泛舟行清光逐流遠水  
氣涵虛明玲瓏一舟滿光景聚寒色圓紋觸風散是時

春未深隄柳亦短短水竹相搖曳松陰復偃蹇風鏗照  
杯綠林烟越遙眄獨樹稍近村寒葦帶城轉趣深魚鳥  
知觴急衣袖袒醉聽榜人歌雙槳歸路緩

### 江城

落梅風正起橫笛上江城古樹團雲氣危樓動角聲亂  
山飛鳥獨細雨暮帆輕候吏津門鼓勞勞此送行

### 鑪峰行

并序

香鑪峰在會稽縣東峰頂爲寺寺僧以二月入  
山春盡即去其他時雖好遊者亦罕一至也其  
徑則因厓鑿石爲梯下臨絕壑而上逼崇巘數  
折躋山巔石脊滑澤如鑑中墳起而旁削可二



人行亘數十武卽土人所謂瘦牛背也由是而  
西徑益險絕寺僧伐竹爲扶欄梯磴相錯右縮  
而左展展者如翼起山中幹袤延而遞左若覆  
蔽然縮如拳陡坼山半岐而二之阻石爲洞缺  
其西僂行聚足而上遂通寺門寺供天竺大士  
簷牙窗戶欄楯隱約叢篁灌木間憑檻四眺萬  
山都出足下惟泰望一峰高與身等春日挈伴  
登其巔作詩紀之將持歸錢唐誇諸同人欲令  
知予未嘗一日不在山中也

亂山出沒雲中間仰視見雲不見山朝陽漸昇雲漸散  
橫度松林過山半香鑪紫烟環帝宮芙蓉秀簇花氣濃

秦王鞭龍入海去萬龍回首盡向東東吸海水西障越  
此山當年龍蛻骨石帆高張天柱撐金門晝開天咫尺  
罡風吹下雲中君縹緲下挾飛仙人飈輪御我薄太清  
竟欲下覽窮八垠東望雲門山北控三江牖海水無聲  
晝昏黑幹旋元氣蟠山峽當頭巨石阻日馭此時欲行  
轉無路攬身已似從天來那識還從隔山去山腰仄徑  
五丁鑿中緣秋毫兩崖削峭壁飛騰蒼鼠愁枯藤聯臂  
猿猱絡有客有客足力窮履穿汗脊不敢從祇我攜筇  
強登涉疊曾大海雲逢逢頗聞茲山靈氣鍾玉筍岫巉  
千年封合有真仙抱經讀那不招我留山中

青樓曲

門前湖水深散盡千黃金樓頭一片月不照美人心

送雲巖之都下

幾度愁難掃臨岐不忍言綈袍寒士淚故劒主人恩  
江北人初到天涯席未溫固陵城上月重又對離樽

西興道中有懷

濛濛雲樹暗遙天隱隱帆檣泊渡船十里午風花似夢  
一江春水雨如綿去來吳越鶯聲裏惆悵湖山禊事前  
不盡蘼蕪原上恨可憐楊柳別時烟

題周五

士乾

松泉圖

孤松與流泉吾之二友也落落彼何人科頭坐其下

胷次時作痛不得進飲食戲書解悶

童子何時投石去  
惠師無處覓心安  
卽傾苦茗偏生惡  
便得濃醪不解寒  
笑爾喉中生茉莉  
尊本來曾次隱巒  
黃庭自在關元上  
只合流霞當晚餐

西湖采蓮曲三首

一天涼雨晚來波  
葉葉田田貼水荷  
南北山分湖裏外  
櫂歌聲出裏湖多

湖心寺外藕花香  
艇子瓜皮繫綠楊  
儂折垂楊郎擘藕  
藕絲不似柳絲長

蓮花多刺藕多泥  
採過蘇隄又白隄  
爭比儂心清似水  
任他魚戲各東西

夏日山中雜詩二首

燭龍排九閭連山火雲互于以眷炎德亢陽亦滋懼賤  
士歲家食飲水樂吾素北牖招涼風清樽挹朝露任誕  
懶修整畏暑散巾屨山居愜幽期市遠跼行步書史偶  
成誦朋輩希把晤此中聊自安鬱抱頓已去人情惡炎  
熱反若蠅蟲附豈伊異人情職是賤貧故朱門一衙市  
白髮一朝暮惜此夏日長感深塵慮痼肺肝豈不煎要  
是違世具一笑何所容喁然五石瓠

出門無所詣入門無所親一壺一束書雜然左右陳勿  
謂此庵僻竹樹成四鄰勿謂此屋小寢處宜此身藜藿  
易得飽枯桐析成薪支牀龜未僵仰臥足可伸入夏頗  
閔雨我亦失水鱗顧茲南東畝作苦力未均原頭草三

尺燭灼氣漸薰晨出晡乃入猶未具一殮勿謂富兒鄙  
尚濟鄉里貧身不妻子庇胡爲動責人

望隔江大雨炊頃而止時浙西久不雨

黑雲如磐罩江路一半斜陽逼高樹陰晴變幻剎那許  
連天鬱塞山氣阻山窗下接胥門潮鷗沙捲地迴驚颭  
風聲潮聲兩相薄屋角震撼山之坳前山號號雷轉石  
瞥眼雲中逗深黑是時久旱雨難得農夫仰天淚橫臆  
破空僵立兩蒼龍盡日擎雲過江北

題自畫山水障子歌

夾山澗水流活活中間一峰拔浪出噴厓飛雪濺珠沫  
下注陰壑秋水濶旋渦洄狀去復遏巨石磊落土囊括

大聲喧沓如甕脫倒挾飛流界木末溪南有麓北有坨  
水勢漸殺流漸達細流汨汨魚鱗鱗軟波十里聲漸歇  
隔溪行人衣短褐倒騎蹇驢不敢越石橋橫截蘚磴滑  
照見鬚眉水底活長風蕭蕭響松栝枯藤絡石路膠轕  
泉聲撼山剔山骨諸峰合抱相迴斡青螺如髻梳石髮  
紛紛亂流欲排闥茅堂秋深風雨多淋漓溼翠當戶潑  
坐中有客興超忽却從腕底寫嶢嶢心搖目眩氣欲奪  
坐見陰森散林樾五日十日一水石此詩此畫從人乞  
家人笑罵我不嗔廣幅吳綾好裁韞

梅史過訪山庵卽次原韻奉荅

有客有客來敝關握手一笑不知還傾心舊雨兼今雨

來上吳山看越山此日病還悲短褐十年貧不上愁顏  
酒徒落落君自許太息風塵坎壈間

七夕雨戲作

早暎絕人粒鬱攸灼人心民生望膏澤一雨動積忱  
咄哉僇父愚乃爲不經談謂此牛女夕良會惜滯淫寶幄  
暗雲路河水何漸漸誰羈飲流輒不得脫重銜翳彼小  
兒女別恨中宵添離懷怨促夜歡愁兩難任咄哉僇父  
愚我言庶可箴靈鵲可填河此語出淮南用以愚世人  
我心殊未厭子儀經銀州道左拳珠簾美人雲中下綠  
鬢垂鬟鬢再拜還祝釐富貴壽考兼又聞郭翰者織女  
實降臨相遺七寶枕投以瓊瑤簪人間勝天上語藝同



抱衾種種無稽說荒謬不可支吁嗟精靈合良匹自古  
今女星在氏下光芒燭蕭森牽牛處河西照耀如商參  
次舍不可越此理胡未諳今夏苦閔雨蘊隆成災稔縱  
陰未能致土龍深自潛大官率諸吏哀籲感至誠今午  
驕陽歛廣檐含晝陰蒸雲塞圓宇和氣萬物涵方將祝  
天孫仰荷神明監銀河瀉千頃下注爲甘霖天孫感我  
意持論正且嚴上乞天帝命報以明德歆雷車駕服箱  
乘風御元霽黃姑酌北斗灑灑六合霑井泉一朝活土  
脈膏且黏晚田頌多稼東海開塵函所祝固已妄所希  
頗亦廉我公及我私天功庶可貪謂余有不信聽我七  
夕吟

題高穎樓明經劇苓圖兼示家雨梅孝廉

去年十月還山陰芒屨踏遍青松林錢清江邊夜泊櫂  
君家欲訪無由尋西風獵獵秋意老幽人行藥秋山早  
一肩蓑笠何處峰恨不相逢真草草吾家阿咸最善君  
爲我稱說君能文狂歌戲弄剡溪月濡墨醉掃稽山雲  
庭前松花落滿地八尺雅鋤手新製蒼龍蟠結太古春  
手挾龍鱗作兒戲平生我亦耽服食綠髓金精好顏色  
雲門山中多古仙雪眉老人舊相識他時曳杖岫嶺巔  
與君相逢會有緣松花玉屑作羹飯穩臥雲山一萬年

秋夜有感

秋聲浩然來而令我愁歎此意獨誰喻匡坐達宵旦轉

蓬離故根哀鴻落江岸惻惻念世情奈此秋節換閉門  
蕭寺深風雨夜過半落葉不可尋呼鐙下階看

得友人京邸書戲題二絕

征鴻依舊又南來短札匆匆手自裁別有一行書紙尾  
故園先問菊花開

同門促駕短轅車懶散偏教滯病夫未逐長安快鼉飽  
西風贏得是江鱸

是程堂集卷第二

嘉慶中成烈開  
縣於真州府舍

秣陵陶士立仿宋書王日華董刊